

"MENTAATI IBUBAPA SATU KEWAJIPAN"

Marilah kita berusaha bersungguh-sungguh untuk meningkatkan ketaqwaan kita kepada Allah SWT dengan sentiasa mematuhi dan melaksanakan perintah-Nya dan meninggalkan segala larangan-Nya . Mudah-mudahan kita memperoleh kesejahteraan dan kerahmatan dari Allah dalam menjalani kehidupan kita di dunia dan akhirat.

Firman Allah SWT dalam surah Al-Isra' ayat 23:

“Dan Tuhan Mu telah perintahkan supaya engkau tidak menyembah melainkan kepadanya semata-mata dan hendaklah engkau berbuat baik kepada ibu bapa. Jika salah seorang dari keduanya atau kedua-dua sekali sampai kepada umur tua dalam jagaan dan peliharaanmu maka janganlah engkau berkata kepada mereka sebarang perkataan kasar sekalipun perkataan “Ah” dan janganlah engkau menengking atau menyergah mereka tetapi katakanlah kepada mereka perkataan yang baik dan mulia (bersopan santun)”.

Kita dituntut agar berbuat baik kepada kedua ibu bapa dan tuntutan tersebut adalah suatu kewajipan yang perlu ditunaikan . Ibu ialah seseorang yang telah melahirkan manusia di muka bumi ini dan setiap permulaan kehidupan manusia adalah bermula dengan kelahiran dari seorang ibu. Maka Islam memandang serius hukum berkaitan hubungan anak dengan ibubapa. Kita diperintahkan untuk sentiasa melakukan kebaikan, berlemah lembut, berbudi bahasa dan bersopan santun terhadap mereka. Lantaran itu juga kita diharamkan dan dilarang keras untuk melakukan kekasaran terhadap mereka samada dengan perbuatan mahupun percakapan hatta dengan perkataan “ah” sekalipun tidak di benarkan memandangkan perkataan tersebut menunjukkan tanda herdik atau membenci terhadap tindakan mereka.

Islam memandang berat berkaitan hubungan dengan kedua ibu bapa kerana merujuk kepada kepayahan dan kesusahan mereka dalam usaha mengandungkan kita , membesarkan , memelihara dan mendidik kita sehingga kita mampu berdikari seperti kita hari ini. Pengorbanan mereka adalah pengorbanan yang cukup besar samada masa, tenaga, harta hatta kepada pengorbanan perasaan mereka demi melihat anak mereka dalam keadaan yang baik dan menggembirakan. Maka atas dasar itulah Islam meletakkan satu tanggungjawab besar terhadap anak-anak sehingga digandingkan dengan persoalan mentauhidkan Allah SWT .

Sesuatu yang amat mengecewakan kita dewasa ini banyak perkara buruk berlaku, anak-anak tidak lagi hormat kepada orang yang lebih tua, berani memaki hamun ibu bapa , sanggup melakukan jenayah terhadap

mereka seperti memukul , sepak terajang bahkan ada yang sanggup membunuh. Sesungguhnya ini adalah tanda-tanda akhir zaman dan tanda kiamat sudah semakin hampir.

Persoalan mentaati ibu bapa adalah sesuatu yang sangat rapat dengan persoalan tauhid kerana sesiapa yang mengaku beriman kepada Allah sedang dia mengabaikan tanggungjawab terhadap para ibu bapanya maka ia bukanlah dikalangan orang yang beriman . Turutan perintah untuk menyembah Allah dan jangan mensyirikkan Allah dengan berbuat baik dengan kedua ibu bapa adalah menunjukkan begitu rapatnya hubungan antara persoalan taat kepada Allah dan taat kepada kedua ibu bapa.

Dewasa ini terdapat ramai di kalangan masyarakat yang mengabaikan tanggungjawab kepada kedua ibu bapa mereka Dan juga terdapat ramai di kalangan masyarakat kita yang tidak mempedulikan nasib ibu bapa dan kurang prihatin terhadap kesusahan ibubapa mereka. Ibu mengandung kita selama 9 bulan dengan penuh kepayahan seterusnya bila kita dilahirkan , kita adalah sebagai makhluk yang sangat lemah hingga kita terpaksa dibantu dibelai oleh si ibu dengan penuh kasih sayang. Atas rahmah dan kasih sayang jualah kita dapat dipelihara dengan penuh kasih sayang seorang ibu sehingga kita menjadi dewasa . Maka dengan kesusahan para ibu bapa yang membesarkan kita menjadi atas kewajipan untuk kita mentaati kedua ibu bapa.

Firman Allah SWT dalam surah Luqman ayat ke 14:

“Dan kami wajibkan manusia berbuat baik kepada kedua ibu bapanya , ibunya telah mengandungnya dengan menanggung kelemahan demi kelemahan dari awal mengandung sehingga akhir menyusunya dan tempoh menceraikan susunya ialah dalam masa dua tahun. Dengan demikian bersyukurlah kepada ku dan kedua ibu bapamu dan ingatlah kepad Aku lah jua tempat dikembalikan untuk menerima balasan”.

Sesungguhnya begitu besar sekali peranan dan pengorbanan kedua ibu bapa kita, lebih lebih lagi terhadap seorang ibu sehingga Islam mengangkat darjat seorang ibu lebih dari seorang bapa.

Hadis daripada Mu’awiyah bin Haidah Al-Qusyairi bahawa Rasulullah s.a.w bersabda;

“Aku bertanya kepada Rasulullah s.a.w, siapakah orang yang paling patut untuk aku berbuat baik? Rasulullah s.a.w menjawab: ibu Mu kemudian aku bertanya lagi siapa ? Rasulullah s.a.w : Ibu Mu kemudian aku bertanya lagi siapa? Rasulullah s.a.w menjawab ibu Mu kemudian aku bertanya lagi siapa? Rasulullah s.a.w menjawab bapa Mu kemudian orang

yang paling hampir dengan mu dan seterusnya”.

(Riwayat At-Tirmidzi)

Menurut maksud hadis tersebut pengulangan lafaz ‘ibuMu’ menunjukkan tentang ketinggian martabat seorang ibu tanpa menafikan hakikat dan tanggung jawab seorang ayah . Pengorbanan seorang ibu adalah lebih besar bermula daripada peringkat kehamilan , seterusnya proses kelahiran , kemudian proses membesar memerlukan satu tahap kesabaran dan kecekalan yang tinggi.

Justeru itu pengorbanan seorang ibu adalah satu pengorbanan yang tidak boleh ditandingi dan sebab itu Islam telah meletakkan penghormatan yang tinggi kepada ibu.

Marilah sama-sama kita bermuhasabah dan berikrar untuk sentiasa menyayangi dan menjaga hubungan baik dengan ibubapa kita.

Berusahalah agar kita tidak menyakiti hati mereka. Perbuatan menyakiti hati ibubapa adalah merupakan dosa yang cukup besar. Berjanjilah pada diri kita bahawa kita akan menjadi anak yang tidak mengecewakan harapan kedua ibu bapa kita dan sentiasa menjaga nama baik keluarga kita dan jauh sekali untuk menjatuhkan maruah keluarga.

Disamping kita berdoa kesejahteraan tentang mereka, sewajarnya kita meraikan mereka dengan sentiasa mengunjungi dan menziarahi mereka , huluskanlah bantuan dan kewangan yang sepatutnya, bawalah mereka turut serta dalam aktiviti percutian kita, sentiasalah bertanya khabar dan prihatin tentang kesihatan mereka. Sebagai anak maka kita hendaklah sentiasa mendahulukan keutamaan ibu walaupun ketika itu ada yang juga yang perlukan perhatian seperti seorang isteri. Seorang suami seharusnya bijak mengatur tentang keutamaan tersebut dan jika isteri yang solehah pasti akan memahami tentang tuntutan tersebut.

Sebab itu bila kita merujuk tentang sejarah ketika di Zaman Nabi s.a.w, maka kita teringat kisah seorang pemuda yang bernama Al-Qamah yang lebih mengutamakan isterinya berbanding ibunya. Maka apakah nasib Al Qamah ketika saat kematiannya sidang Jumaat sekalian sehingga Nabi s.a.w mengugut untuk membakar Al Qamah jika ibunya tidak memaafkan kesalahan anaknya itu. Akhirnya selepas puas dipujuk, maka dengan penuh rasa kasih sayang ibu memaafkan Al Qamah dan Al Qamah dapat menghembuskan nafasnya dengan penuh tenteram.

Mahukah peristiwa tersebut terjadi kepada diri kita? Persoalan dan peristiwa ini seharusnya dijadikan pengajaran dan peringatan semoga kita tidak termasuk dari golongan yang menderhakai kedua ibu bapa kita.

Kita hendaklah mendoakan kesejahteraan mereka kerana jika kita menghitung tentang pengorbanan ibu bapa kita nescaya kita tidak mampu

untuk membalas jasa mereka. Lantaran itu kita hanya mampu untuk mendoakan mereka semoga dibalas oleh Allah SWT segala jasa dan tenaga yang telah dicurahkan kepada kita. Semoga kita sentiasa bermohon kepada Allah agar kita termasuk dalam golongan yang sentiasa bertaubat dan diberkati di dunia dan Akhirat.

Firman Allah SWT dalam surah *Al-Isra'* : 24

“Dan Hendaklah engkau merendahkan diri kepada keduanya kerana kasihan belas dan kasih sayang Mu dan Doakanlah untuk mereka dengan berkata : Wahai tuhan kami cucurilah rahmat kepada kedua ibu bapa kami sebagaimana mereka mencurahkan kasih sayangnya memelihara dan mendidikku semasa kecil”.